

Vedtekter for Stad Venstre

Godkjent på skipingsmøtet den 13. januar 2019.

§ 1. FORMÅL

Stad Venstre har til formål å arbeide aktivt for Venstre si sak i Stad kommune i samsvar med Venstre sine hovudvedtekter og Venstre sitt program.

§ 2. MEDLEMSKAP

Personar over 15 år som ikkje er medlem i noko anna parti, og som deler Venstre sitt grunnsyn, kan bli medlemmer i Venstre. Medlemskapet gjeld frå det tidspunktet ein melder seg inn. Medlemsrettar får ein når kontingenten er betalt. Medlemskap, og dei rettar medlemskap gjev, gjeld berre i eitt lokallag. Medlemskapen er personleg, og medlemsrettar kan ikkje overførast til andre.

§ 3. ORGANISASJON

I Venstre er medlemmene organisert gjennom lokallag, fylkeslag og Venstres nasjonale organisasjon.

Venstre sine partiorgan i lokallaget er lokallagsstyret og lokallagsårsmøtet. Det kan innkallast til medlemsmøte ved fullmakter som er gjeve av desse vedtektene eller av årsmøtet.

Stad Venstre er knytt til Venstres Opplysnings- og Studieforbund (VO).

Begge kjønn skal som ein hovudregel vere representert med minst 40 prosent i Stad Venstre sitt styre, utval og komitéar.

Folkevald for Stad Venstre vert ein berre ved å stille til val på Stad Venstre si valliste og på Venstre sitt program. Har ein stilt til val på Stad Venstre sitt program, så er dette den kontrakten ein har med veljarane.

Stad Venstre sine partiorgan kan ikkje instruere folkevalde som er innvalde for Stad Venstre utover det programmet dei er valde på. Dersom det er punkt i eit partiprogram ein folkevald ikkje kan følgje, så har den folkevalde plikt til å informere vedtaksorganet/ nominasjonsmøtet om dette.

Stad Venstre sin folkevalde representantar pliktar å skape gode politiske prosessar og lytte til innspel frå eige parti.

Stad Venstre sine folkevalde representantar danner i kommunestyret si eiga gruppe og vel gruppeleiar.

Protokollar

Møteprotokollar frå lokallaget skal sendast til alle som er innkalla til møta, og vert elles lagde ut på laget si heimeside.

Røystereglar i lokallaget

Møteleiaren gjer framlegg om korleis røystingane skal gå føre seg, men personval skal skje skriftleg dersom minst éin person krev det. Vedtak i andre saker enn dei som gjeld vedtektsendring, vert gjort med fleirtalsvedtak. Dersom røystetala for og mot i ei sak er like, fell framlegget.

Ved val av leiar og nestleiar vert det kravd at over halvparten av røystene er for kandidaten. Oppnår ein ikkje det ved første votering, skal det vere bunde omval mellom dei to som har fått flest røyster. Dersom det er røystelikskap ved andre valomgang, vert valet avgjort ved loddrekking. Røystesetlar ved val skal vere påført så mange namn som det skal veljast personar i valomgangen.

§ 4. STYRET

Styret leiar laget si verksemd mellom årsmøta i samsvar med vedtektene og dei vedtaka som vert gjort av årsmøtet. Styret skal ha minst fire møte mellom kvart ordinært årsmøte, og elles så ofte som leiaren eller

1/3 av styret krev det. Styret er vedtaksført når minst halvparten, av dei leiaren eller nestleiaren, er til stades. Lokallagsleiaren kallar styret saman og leier møta. Styremøta er i utgangspunktet opne for medlemmane i lokallaget.

Leiaren for Venstre si kommunestyregruppe møter i styret, men utan røysterett dersom personen ikkje er styremedlem.

Lokallagsstyret skal følgje opp vedtektene og har ansvar for lokallaget sin økonomi, nettsider, politikk, informasjonsverksemd, skulering, medlemsverving og utoverretta verksemd.

Lokallagsstyret kan oppnemne eigne utval, komitéar og nemnder til å ta seg av særskilde oppgåver, t.d. valkamputval, skuleringsutval, programkomité og nominasjonsnemnd.

I kommunevalår skal styret sørge for at det vert nemnt opp ein programkomité som skal utarbeide framlegg til eige valprogram for Stad Venstre. Programmet vert vedteke av årsmøtet eller eit medlemsmøte som vert innkalla med 14 dagars varsel.

Etter eit kommunestyreval kallar styret inn dei representantane som har blitt folkevalde for Venstre i kommunestyret til konstituerande møte. Dei folkevalde konstituerer seg sjølve og vel gruppeleiar.

I år før kommunevalår skal styret setje i gang ein open nominasjonsprosess og sørge for at nominasjonsmøtet vert halde innan utgangen av februar (i valåret). Styret førebur nominasjonen og nemner opp nominasjonsnemnd. Vallista vert sett opp på nominasjonsmøtet. Nominasjonsmøtet si samansetting og røystereglar er dei same som for årsmøtet.

Før fylkeslaget sitt nominasjonsmøte skal årsmøtet eller eit medlemsmøte velje delegatar og varadelegatar. Eit medlemsmøte for å velje delegatar skal kallast inn med 14 dagars varsel ved lysing i lokalavisa eller skriftleg invitasjon til alle medlemmer i lokallaget. Delegatane skal ha fullmakt underskrive av leiar i lokallaget.

§ 5. ÅRSMØTET I LOKALLAGET

Årsmøtet er øvste styringsorgan for lokallaget. Årsmøtet skal haldast årleg innan utgangen av januar. Styret kallar inn til årsmøtet med minst 14 dagars varsel. I innkallinga vert sett ein frist til å fremje framlegg til politiske fråsegner og andre framlegg som medlemmer vil ta opp på årsmøtet. Årsmøtet skal berre gjere vedtak i dei sakene som er sett opp på saklista for møtet.

Ekstraordinært årsmøte vert halde når styret vedtek det, eller når minst ein tredel av medlemmene skriftleg krev det. Ekstraordinært årsmøte kan berre drøfte og gjere vedtak i dei sakene som er førde opp i innkallinga til møtet. Tid og stad vert fastsett av lokallagsstyret. Møtet vert innkalla med minst 14 dagars varsel.

Alle medlemmer etter §2 har tale-, framlegg- og røysterett på årsmøtet. Kontingenten vert rekna som betalt dersom kontingenten er betalt for inneverande år for lag som har årsmøte før årsskiftet, eller for året før eller inneverande år for lag som har årsmøte i januar. Medlemmer som er innmelde etter 1.11 må også ha betalt kontingent for å få røysterett.

Årsmøtet er i utgangspunktet eit ope møte.

Årsmøtet vert opna av lokallagsleiaren som leiar konstitueringa av møtet der det vert gjort følgjande val:

- 1) Møteleiar
- 2) Minst ein skrivar som fører møteprotokollen
- 3) Røysteteljarar
- 4) Redaksjonsnemnd for politiske fråsegner
- 5) To personar til å skrive under protokollen.

Protokollen skal vere underskriven og tilgjengeleg seinast ein månad etter årsmøtet. Endeleg godkjenning av protokollen skjer i det første styremøtet etter protokollen er underskriven.

Val

Årsmøtet skal velje:

1.

Lokallagsstyre. Årsmøtet vel eit styre med 5 medlemmer: leiar, nestleiar, opplæringsansvarleg, kasserar, skrivar, og 3 varamedlemer. I tillegg til dei 5 skal unge Venstre ha ein styremedlem dersom unge Venstre har lokallag i kommunen. Leiaren i det lokale unge Venstre laget tiltrer styret med stemmerett. Leiar og to av styremedlemmene står på val kvart år. Varamedlemmene står på val kvart år.

2.

Ein revisor til å stå for revisjon av lokallaget sin rekneskap. Revisoren kan ikkje ha andre verv i laget.

3.

Delegatar til fylkesårsmøtet etter framlegg frå styret. Kvart årsmøte vel delegatar og varadelegatar til fylkesårsmøtet i samsvar med lokallaget sin kvote. Delegatane skal ha fullmakt underskriven av leiar i lokallaget.

4.

Valnemnd. Årsmøtet vel ei valnemnd på 3 medlemmer etter framlegg frå styret. Valnemnda er valt for 1 år. Valnemnda konstituerer seg sjølv. Valnemnda kjem på neste årsmøte med framlegg til val av styre og revisor. Ingen av medlemmane eller varamedlemmane i det sitjande lokallagsstyret kan vere medlemmer eller varamedlemer til valnemnda.

Årsmøte skal vidare:

1. Handsame styret sitt framlegg til årsmelding og rekneskap.

2. Fastsetje lokallaget sin del av kontingenten for neste år.

3. Drøfte og røyste over andre saker som er fremja i samsvar med vedtektene.

§ 6. SAMARBEIDET MELLOM LAGET OG KOMMUNESTYREGRUPPA

Leiaren i Venstre si kommunestyregruppe skal halde lagsleiaren løpande informert om møta og dei viktigaste sakene i kommunestyret. Før kvart møte i kommunestyret skal det som hovedregel kallast inn til eit ope gruppemøte der alle medlemmer blir invitert. Leiaren av kommunesyregruppa er ansvarleg for å kalle inn til og leie desse møta.

Val av ordførar, varaordførar, formannskap og medlemmer til dei viktigaste kommunale styre, råd og utval skal drøftast på eit eige møte mellom gruppa og styret før eit nytt kommunestyre vert konstituert.

§ 7. ENDRINGAR I VEDTEKTENE

Desse vedtektene vert endra av årsmøtet når minst to tredeler røystar for det. Framlegg til vedtektsendringar må på førehand leggjast fram for styret, og framlegg til endringar må av styret vere sende ut til medlemmene minst 14 dagar før årsmøtet. Endringar av vedtektene skal godkjennast av fylkesstyret. Eit eventuelt avslag på godkjenning i fylkesstyret kan klagast til sentralstyret.

§ 8. OPPLØYSING AV LAGET

Framlegg om oppløysing av laget må drøftast på årsmøtet. Vert framlegget vedteke med 2/3 fleirtal, skal det sendast fylkesstyret til uttale. Endeleg vedtak om oppløysing av laget må, for å vere gyldig, vedtakast med 2/3 fleirtal på neste årsmøte. Dersom eit lag vert oppløyst, skal formue, eigedom, arkiv o.a. overførast til fylkeslaget. Alle verdiar skal stå urørt i 5 år i tilfelle laget vert starta oppatt. Dersom det ikkje vert starta opp nytt lag, rår fylkesstyret over midlane. Dersom laget vert slått saman med eit anna Venstrelag kan ein overføre formue, eigedom, arkiv o.a. til det nyskipa laget. Dersom laget ikkje er aktivt i meir enn eitt år, kan fylkeslaget eller Venstres sin Hovedorganisasjon konstituere nytt styre, eventuelt oppløyse laget.